

Pinerluttup aallaavigineqarneranut taarsiullugu siunissami pinerluutigisap aallaavigineqartalernissaa pillugu Kalaallit Nunaani pinerluttulerinermik inatsisip allanngortinneqarnissaa siunertaralugu Naalakkersuisut Naalagaaffeqatigiinni oqartussaasunut atassuteqarnissamut peqquneqarnissaannik inatsisartut aalajangiiffigisassaattut siunnersuut.

(Inatsisartunut ilaasortaq, Bo Martinsen, Demokraatit)

Akissuteqaat

(Inuussutissarsiornermut, Aatsitassanut, Nukissiutitut, Inatsisit Atuutsinneqarnerannut Naligiissitaanermullu Naalakkersuisoq)

Siullermeerinninneq

Pinerluttulerinermi inatsimmik aamma eqqartuussiveqarfimmik, ullutsinnut naleqquttumik aamma innuttaasut inatsisitigut naapertuilluartoqarneranik ersersitsisumik inuiaqatigiinni peqarnissarput pingaaruteqarpoq. Massakkut eqqartuussiveqarfitta qanoq issueqarnera misissuiffigiumallugu qinigaaffimmi kingullermi innuttaasut inatsisitigut naapertuilluartoqarneranik misigisimanerisa misissuiffigineqarnissaa, aamma Danmarkimi Kalaallillu Nunaanni pineqaatissiisarnermut killiffinnik assersuussisusaaq, Naalakkersuisut imissutigisimavaat. Siunissami eqqartuussisoqarfik pillugu nutartikkamik aalajangiisarnerit ingerlanneqarnissaannut tunngaviup ilasaanik nalunaarusiaq pilersitsisaaq, tassani tamatta eqqartuussiveqarfimmi tunngaviusumik tunngaviit killiliussallu isummerfigissavagut. Eqqartuussisoqarfiup aaqquissuussiffigeqqinnissaa anguniagaavoq aamma aalajangiisartut, sulianik ilisimasallit aamma innuttaasut ilanngunneqarnissaannik tamanna piumasaqaatitaqarpoq. Nalunaarusiaq oktoberimi saqqummissaaq, aamma tamatuma kingorna partiit tamarmik aallarnersaataasumik oqaloqatigiinnissanut qaaqquneqassapput.

Eqqartuussisoqarfiup aaqquissuussiffigeqqinneqarnissaanut suliaq ukiunik arlalinnik sivilissuseqassaaq, aamma taamaammat massakkut killissarititaasut isummerfigineqarnissaat aamma pingaaruteqarpoq aamma taamaaliortoqarnissaanut pissutissaqalermat siunnersuusiortoq Naalakkersuisut qutsavigiumavaat.

Pinerluttulerinermik suliat eqqartuussutigineqaraangata, qanoq kinguneqarnissaat pillugit massakkut siumut oqaatiginissinnaaneq ajornartoq aamma aalajangiinerit nalaatsornerinnaasumik aalajangiiffiusartut, siunnersuummut matumunnga tunngavilersuummi allaaserineqarput. Tamanna Naalakkersuisut isumaqatiginngilaat. Soorlu nunani demogratiskiusuni allani naligiimmik pinnittarnermik tunngavik nunatsinni tunngaviusumik tunngaviuvoq. Pinerluttuliortarnernut assingusunut sulianut sulisaaseq aallaavigineqartarmat, aamma pissutsit, kinaassusersiortuusussaannngitsut aamma naleqquttut, tamatuma avaqqunneqarnissaanut tunngaveqartitsinissaat, tamatuma kinguneraa. Naligiimmik pinnittarnermik tunngaviup avaqqunneqarsinnaanera pisariaqartinneqarpoq, tassami amerlanernit immikkooruteqarnerusunik suliaqarsinnaavoq. Assersuutigalugu anaanamut, angummik meeqqaminik pinngitsaaliilluni atoqateqarsimasumik toqutsisumut pineqaatissiineq eqqartuussutigineqartoq, aamma ikiaroorartunik tuniniaasut tunuliaqutaannut, inummik imminut aningaasanik akiligassaqartumik toqutsisumut pineqaatissiineq eqqartuussutigineqartoq assigiissasut isumaqarpugut? Suliat taakku marluk pineqaatissiinermik inerineqartariaqarput, tassami toqutsineq pineqarpoq, kisianni suliat assigiinnngillat.

Pinerluttulerinermi inatsisitsinni 2008-meersumi iliuuseqartup tunngavigineqarnera aamma iliuutsip tunngavigineqarnera naligiissinneqarput. Inatsimmik unioqqutitsinerup peqqarniissusaa (iliuuserisap tunngavigineqarnera) aamma iliuuseqartup inuttut atugarisai (iliuuseqartup tunngavigineqarnera) eqqartuussisut pineqaatissiissutit eqqartuussutigineqarneranni eqqarsaatigissagaat, tamatuma kinguneraa. Tunngaviit taakku 2 naligiissineqarnerat, oqaasertaliornermi takuneqarsinnaavoq. Pinerluttuliornermi iliuuserisap aamma pinerluttuliortup kingumut innuttaasutut inooqataasinnaalersitseqqinnissaanut periarfissaq eqqartuussisut isumaliutiginninnerni ilaassasut, tamatuma kinguneraa.

Oqimaalutaaneq taanna aamma qallunaat pillaatissiisarnermik inatsimmi § 80-imi takuneqarsinnaavoq, tassani taassuma assigisaanik inatsimmik unioqqutitsinerup peqqarniissusaa (iliuuserisap tunngavigineqarnera) aamma iliuuseqartop pillugu paasissutissat (iliuuseqartup tunngavigineqarnera) eqqarsaatigineqassallutik.

Eqqartuussiviit pinerluuteqarsimaneq pillugu suliamik aalajangiisussaatiillugit, tunngaviit taakku marluk ilaatinneqartariaqartut, Naalakkersuisut suli taama isumaqarput, tassami suliat allanit allaanerussuteqartut, soorlu siuliani assersuutigineqartumi taaneqartut, eqqarsaatigineqarnissaat periarfissaasariaqarpoq.

Tamanna tunngavigalugu Naalakkersuisut allannguutissatut siunnersuut tulliuuttoq saqqummiutissavaat:

Kalaallit Nunaanni siunissami eqqartuussiveqarfik pillugu oqallinnerni, piffissami aggersumi naammassineqartussami, iliuuseqarnermik tunngaviup aamma iliuuseqartup tunngavigineqarnera pillugit apeqqutip ilanngunneqarnissaa, taamaalilluni pinerluttulerinermi inatsimmi tunngaviusumik tunngaviit ataatsimut nalilersorneqarneranni ilaassamat, pillugu Naalakkersuisut peqquneqarnissaannik aalajangiiffigisassatut siunnersuut.